

ASO FARAILE, 25 IANUARI 2019

Na nofoia e le Fofoga Fetalai le Nofoa i le itula e 9:10 i le taeao.

Tatalo.

FOFOGA FETALAI: Ou te faasilasila atu ua toe amatalia nei Taulumaga ma Galuega a le Fono Aoao Faitulafono. E le o po se lilo i le aso ananafi ma le tatou faamavae atu i le Afioga i le tatou uso, le sui usufono ia Pau Sefo Taumata Pau e tusa ai o le tatou Galuega. Tau ia ina ia faamaise le Atua i le faletua faapea le nofo a alo ma le aiga.

**TULAFONO TAU FAAOFI O LE FAATATAUINA O TUPE
FAAOPOPO (NU.1) 2018/2019 - iloiloga auiliili faaauau mai le aso
Fono ananafi**

FOFOGA FETALAI: E tolopo Galuega a le Fono Aoao i le aso Fono ananafi ua oo le iloiloga auiliili o le Tulafono Tau Faaofi i le Ofisa o le Komesina o Sulufaiga ma o le a toe faaauau loa le tatou galuega.

**FAAMATALAGA MUAMUA
VAEGATUPE MA TALA FAATATAU
FAAOPOPO I TUPE FAATATAUINA**

MATAGALUEGA	FAAMATALAGA	AOFAI TUPE ALU
KOMESINA O SULUFAIGA:		\$50,643.

Faamaonia.

KOMISI O GALUEGA A LE MALO:	\$69,115.
------------------------------------	------------------

Faamaonia.

AUAUNAGA TAU TINEI MU:	\$83,987.
-------------------------------	------------------

Faamaonia.

25 IANUARI 2019

**Tulafono Tau Faaofi o le Faatatauina o Tupe Faaopoopo (Nu.1)
2018/2019 - iloiloga auiliili**

**FAALAPOTOPOTOGA FAAVAE \$35,955.
TAU FATUGAO A SAMOA:**

Faamaonia.

AUAUNAGA FAA-SOIFUA MALOLOINA: \$5,735,928.

Faamaonia.

OFISA TAUSI MAVAEGA: \$17,294.

Faamaonia.

**PULEGA O TUSI PASI MA FAAILOGA
TAUALOA: \$46,200.**

Faamaonia.

**PULEGA MO TAGATA TAFAFAO
MAIMOA MAI: \$55,796.**

Faamaonia.

OFISA O LE PULE FAATONU: \$23,124.

Faamaonia.

**OFISA O SUESUEGA FAA-SAIENISI
A SAMOA: \$43.368.**

Faamaonia.

25 IANUARI 2019

**Tulafono Tau Faaofi o le Faatatauina o Tupe Faaopoopo (Nu.1)
2018/2019 - iloiloga auiliili**

IUNIVESITE AOA O SAMOA: \$339,727.

Faamaonia.

**PULEGA O MALAE TAALO MA
TAALOGA A SAMOA: \$23,994.**

Faamaonia.

**FAALAPOTOPOTOGA TUMAOTI
A LE MALO: \$32,664.**

Faamaonia.

FUAINUMERA FAAMAUMAUINA: \$57,613.

Faamaonia.

**PULEGA O FELAU AIGA I LE
LAUELEELE: \$103,820.**

Faamaonia.

**KOMISI O LE TOEFUATAIGA O
TULAFONO A SAMOA: \$16,263.**

Faamaonia.

**AUAUNAGA TAU FALEPUIPUI
MA LE TOEFUATAIGA: \$2,335,970.**

Faamaonia.

25 IANUARI 2019

**Tulafono Tau Faaofi o le Faatatauina o Tupe Faaopoopo (Nu.1)
2018/2019 - iloiloga auiliili**

**AOFAI FAAOPOPOGA I TUPE ALU
AOAO 2018/2019: \$16,557,282.**

Faamaonia.

FAAMATALAGA LONA LUA

FAAITIITIGA I TUPE FAATATAUINA

MATAGALUEGA	FAAMATALAGA	AOFAI TUPE FAAITIITIA
TUPE		\$(165,000).

Faamaonia.

FAAMATALAGA:

FOFOGA FETALAI: O lo o i ai le Teuteuga i le FAAMATALAGA e pei ona faaalua i le Pepa Faaopoopo o Galuega.

Tulai mai le Taitaifono o le Komiti o Tupe Maua ma Tupe Totogi.

Afioga ALIIMALEMANU ALOFA TUUAU: E faatalofa atu i lau Afioga i le Fofoga Fetalai ma sui usufono o le Palemene faapea Ofisa Sili o Pulega. Lau Afioga i le Fofoga Fetalai ou te faatu le Teuteuga i le Faamatalaga Muamua e faapea:

“TEUTEUGA:

1. Mo Meataitasi **MATAGALUEGA O PUNAOA FAALENATURA & SIOSIOMAGA**, I lalo o Faaopoopoga i Galuega e Avea ai ma Sui o le Malo, ia suia le faaupuga ðLisi a le Digicel e Tutu i le Nofoga e Tasiö i le faaupuga ðPili Eletise mo Pou o Fesootaiga a le Digicel.ö
2. Mo Meataitasi **OFISA O LE LOIA SILI** i lalo o Faaopoopoga i Galuega Faatino e Tuuina atu e le Matagaluega, ia faaofi fuainumera ð5.0ö a o lumanai ai ðVaega Tau Pisinisi ma Tulafono faava o Maloö ma faaofi le fuainumera ð6.0ö a o lumanai ai le ðMoliaga Tau Soligatulafono ó Faamasinoga Mauaö
3. Mo Meataitasi **PULEGA A SAMOA MO TAGATA TAFALAO MAIMO MAI I FAFO**, i lalo o Faaopoopoga i Galuega Faatino e Tuuina atu e le Faalapotopotoga Tumaoti a le Malo (SOE), o Meataitasi 4.0, ia suia ðMaketi i Asiaö i le ðAuaunaga tau Suesuega ma Numera Faamauiinaö.

25 IANUARI 2019

**Tulafono Tau Faaofi o le Faatatauina o Tupe Faaopoopo (Nu.1)
2018/2019 – faitauga faatolu**

Faamaonia le Teuteuga.

Faamaonia le Faamatalaga e pei ona Teuteuina.

FUAIUPU 2: Faamatuu atu ma le Faatatauina o le \$16,557,282 mai le Faaputugatupe a le Matagaluega o Tupe.

Faamaonia.

FUAIUPU 3: Faaititiga o aofaiga na uluai faatatauina ma toe faasoasoa atu i isi galuega faatino ma galuega faatino laiti.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Faatatauina o Tupe Faaopoopo (Nu.1) 2018/2019.

Faamaonia.

Na faagasolo le Tulafono Tau Faaofi o le Faatatauina o Tupe Faaopoopo (Nu.1) 2018/2019 faatasi ma le Teuteuga.

**TULAFONO TAU FAAOFI O LE FAATATAUINA O TUPE
FAAOPOPO (Nu.1) 2018/2019 – faitauga faatolu.**

Afioga Hon SILI EPA TUIOTI: Lau Afioga i le Fofoga Fetalai, a o le i faatuina le lafo, avea ia lenei avanoa e momoli atu ai le faamalo ma le faafetai i lau Afioga, ia faapea foi le mamalu o sui usufono o le Palemene i le iloiloaina ma le lagolagoina o le Tala Faatatau o Tupe Faaopoopo (Nu.1) o lenei tausaga. Malo galulue.

Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe Faaopoopo (Nu.1) 2018/2019 i lona faitauga faatolu.*

Faaluaaina e le Minisita mo Aoga, Taaloga ma Aganuu, Minisita mo Fesootaiga ma Faamatalaga Tekonolosi, ma le Minisita mo Faamasinoga.

25 IANUARI 2019

**Tulafono Tau Faaofi o Fanua ma Suafa 2019
- faitauga muamua**

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.

Na faaalua le agaga fiafia o le Maota i le patipati o latou aao i le pasia ai o le Tala Faatatau Faaopoopo o le Tupe (Nu.1) 2018/2019.

**TULAFONO TAU FAAOFI O FANUA MA SUAFA 2019
– faitauga muamua**

Afioga Hon FAAOLESA KATOPAU T. AINUU (Minisita mo Faamasinoga ma Pulega tau Faamasinoga): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Fanua ma Suafa 2019 i lona faitauga muamua.*

Faaluaina e le Minisita mo Aoga, Taaloga ma Aganuu, Minisita mo Tupe Maua, Minisita mo Fesootaiga ma Faamatalaga Tekonolosi ma le Minisita o Tupe.

Na faamaonia le lafo ma faitauina le Tulafono Tau Faaofi o Fanua ma Suafa 2019 i lona faitauga muamua.

**TULAFONO TAU FAAOFI O TEUTEUGA O LE TULAFONO O LE
FETUFAAIGA O FAAMATALAGA TAU LAFOGA 2019
– faitauga muamua.**

Afioga Hon TIALAVEA FEA LENIU TIONISIO HUNT (Minisita mo Tupe Maua): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Fetufaaiga o Faamatalaga tau Lafoga 2019 i lona faitauga muamua.*

Faaluaina e le Minisita mo Aoga, Taaloga ma Aganuu, Minisita o Tupe ma le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo ma faitauina le Tulafono Tau Faaofi o Teuteuga o le Tulafono o le Fetufaaiga o Faamatalaga tau Lafoga 2019 i lona faitauga muamua.

**TULAFONO TAU FAAOFI O TEUTEUGA O LE TULAFONO O LE
KOMISI O LE GAGANA SAMOA 2019 – faitauga muamua**

Afioga Hon LOAU SOLAMALEMALO KENETI SIO (Minisita mo Aoga, Taaloga ma Aganuu): Faafetai i lau Afioga i le Fofoga Fetalai.

25 IANUARI 2019

**Tulafono Tau Faaofi mo Tagata Solitulafono Toe Faafoi mai 2019
- faitauga muamua**

Ia e faalua foi le agaga faafetai i lau Afioga siitia o le taulaga i lenei taeao, faamua ma le faasagi i le Atua aua lo tatou valaauina.

Ae ua ou tulai atu ma le agaga faaaloalo, e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Komisi o le Gagana Samoa 2019 i lona faitauga muamua.*

Faaluaina e le Minisita mo Fesootaiga ma Faamatalaga Tekonolosi, Minisita mo Faamasinoga, Minisita mo Tupe Maua ma le Minisita o Tupe.

Na faamaonia le lafo ma faitauina le Tulafono Tau Faaofi o Teuteuga o le Tulafono o le Komisi o le Gagana Samoa 2019 i lona faitauga muamua.

**TULAFONO TAU FAAOFI MO TAGATA SOLITULAFONO TOE
FAAFOI MAI 2019 – faitauga muamua.**

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELIEGAOI (Palemia): Lau Afioga i le Fofoga Fetalai ou te tulai atu ma le faaaloalo e faatu le lafo, *Ina ia faitauina nei le Tulafono Tau Faaofi mo Tagata Solitulafono Toe Faafoi Mai 2019 i lona faitauga muamua.*

Faaluaina e le Minisita mo le Soifua Maloloina ma le Minisita mo Pisinisi, Alamanuia ma Leipa.

Na faamaonia le lafo ma faitauina le Tulafono Tau Faaofi mo Tagata Solitulafono Toe Faafoi Mai 2019 i lona faitauga muamua.

**TULAFONO TAU FAAOFI O TEUTEUGA O LE TULAFONO O LE
FAALAPOTOPOTOGA O TAU MO FAALAVELAVE TUTUPU
FAAFUASEI 2019 – faitauga muamua**

Afioga Hon LAUTAFI FIO SELAFI PURCELL (Minisita mo Pisinisi, Alamanuia ma Leipa): Faafetai atu i lau Afioga i le Fofoga Fetalai, faamalo foi le onosai i lenei taeao i le fonotaga mulimuli o lenei vaiaso. Faamalo atu i le Maota faapea foi Ofisa Sili o Pulega o Matagaluega o mafai ona faatasi mai, malo lava le onosai.

Lau Afioga i le Fofoga Fetalai ua ou tulai atu ma le faaaloalo e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Faalapotopotoga o Tau mo Faalavelave Tutupu Faafuasei 2019 i lona faitauga muamua.*

Faaluaina e le Minisita mo le Soifua Maloloina ma le Minisita mo le Faalapotopotoga o Tagata Tafafao Maimoa Mai Fafu.

25 IANUARI 2019

Tulafono Tau Faaofi o Teuteuga o le Tulafono o le Matagaluega o le Soifua Maloloina 2019 – faitauga muamua

Na faamaonia le lafo ma faitauina le Tulafono Tau Faaofi o Teuteuga o le Tulafono o le Faalapotopotoga o Taui mo Faalavelave Tutupu Faafluasei 2019 i lona faitauga muamua.

TULAFONO TAU FAAOFI O TEUTEUGA O LE TULAFONO O LE MATAGALUEGA O LE SOIFUA MALOLOINA 2019 – faitauga muamua.

Afioga Hon TUITAMA TALAILELEI TUITAMA (Minisita mo le Soifua Maloloina): Lau Afioga i le Fofoga Fetalai ou te tulai ma le faaaloalo e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Soifua Maloloina 2019 i lona faitauga muamua.*

Faaluaina e le Minisita mo Pisinisi, Alamanuia ma Leipa, Minisita mo le Faalapotopotoga o Tagata Maimoa mai Fafu, Minisita mo Galuega, Felauaiga ma Atinae Esee, Minisita mo Faatoaga ma Faigafaiva ma le Minisita mo Tupe Maua.

Na faamaonia le lafo ma faitauina le Tulafono Tau Faaofi o Teuteuga o le Tulafono o le Soifua Maloloina 2019 i lona faitauga muamua.

TULAFONO TAU FAAOFI O TEUTEUGA O LE TULAFONO O LE OFISA AUTU O MATAUPU FAALETULAFONO MO TAGATA LAUTELE 2019 – faitauga muamua.

Afioga Hon FAAOLESA KATOPAU T AINUU: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Ofisa Autu o Mataupu Faaletulafono mo Tagata Lautele 2019 i lona faitauga muamua.*

Faaluaina e le Minisita mo Fesootaiga ma Faamatalaga Tekonolosi ma le Minisita mo Aoga, Taaloga ma Aganuu.

Na faamaonia le lafo ma faitauina le Tulafono Tau Faaofi o Teuteuga o le Tulafono o le Ofisa Autu o Mataupu Faaletulafono mo Tagata Lautele 2019 i lona faitauga muamua.

TULAFONO TAU FAAOFI O TEUTEUGA O LE TULAFONO O LE SOIFUA MALOLOINA 2019 – faitauga faalua.

FOFOGA FETALAI: Talu ai ua ou taulimaina le Tusi Faamaonia o le Tulaga Faanatinati i le Tulafono Tau Faaofi lenei, o lea o le a sagai atu loa i le faitauga faalua.

25 IANUARI 2019

**Tulafono Tau Faaofi o Teuteuga o le Tulafono o le Soifua Maloloina 2019
– faitauga faalua**

Ma ou te tapa lau Afioga i le Minisita mo le Soifua Maloloina.

Afioga Hon TUITAMA TALALELEI TUITAMA: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Soifua Maloloina 2019 i lona faitauga faalua ma ou te fia tautala faamalamalama i ai.*

Faaluaina e le Minisita mo Galuega, Felauaiga ma Atinae Eeseese, Minisita mo Pisinisi, Alamanuia ma Leipa ma le Minisita mo Tupe Maua.

FOFOGA FETALAI: Ae le i tuuina atu le fesili, ou te tapa lau Afioga i le Minisita mo lau saunoaga faamalamalama.

Afioga Hon TUITAMA TALALELEI TUITAMA: Lau Afioga i le Fofoga Fetalai, malo le soifua manuia i lau Afioga, faapea foi le mamalu o sui usufono o lenei fonotaga. Ua tatou maua mai lenei taeao fou, ma lenei foi aso fou faaopoopoina i le faitauina o aso o lo outou soifua ma so matou ola. O lea foi ua tu mai lagi le lagaali a Tamafaiga e ala i le taulaga molia, e pei ona tamua ai lau Afioga mo galuega o lenei aso. O le tatou faanonogamanu na i lo tatou Matai Silisili Ese, ina ia to mai ni manu aua le faamoemoe o lenei aso.

Lau Afioga i le Fofoga Fetalai ma le mamalu o lenei Fonotaga, o lenei Tulafono atonu e le o toe fou i se faalogologo ma se faafofoga a lo tatou Maota faapea foi lo tatou atunuu. Ua sefuluvalu nei masina o galulue i le tuufaatasia o lenei faamoemoe. Ma ua nofofale foi ia Satuiamaa i le tofa ma le utaga o lenei Maota aua ua talanoaina foi i le tele o Fonotaga ua mavae, talu mai ona afuafua mai i le taimi nei lenei faamoemoe. E i ai la le talitonuga ua tele ina malamalama le Maota nei faapea foi le lautele o le atunuu, i le talanoaina pea o lenei faamoemoe. E ui ona o lea faatoa maea le tapenaga faaletulafono ma faufau ai le Tulafono ina ia faataunuu ai lea faamoemoe, o lea la ua tagofia nei e la tatou Palemene i le aso.

O lenei Tulafono o lo o talosagaina ai le faaofiina atu o le Matagaluega a le Soifua Maloloina 2006 Tulafono Autu, ma soloia le Tulafono o Auaunaga Faasoifua Maloloina 2014. O se auala e pitosili lea ona agagofie i le faatinoina o lenei faamoemoe ina ia tuufaatasia ai le Matagaluega. O le agaga o le tuufaatasiga ua le tasi foi ae ua tele taimi o le tatou Fonotaga ua alu, ma futia ua sola o lea sa faamalamalama ai foi ia tulaga, ona ua le ausia le faamoemoe o le tuufaatasiga, aua le siitia o auaunaga faasoifua maloloina i ona tulaga manaomia. O lea foi na maea le galuega a le Komiti Faapitoa, sa tuuina atu i ai lenei Tulafono ma lenei faamoemoe e galulue ai, ma o lo o galulue pea e oo mai i le taimi nei, i isi foi manaoga e faatino ai lenei Tulafono. Ae o lea ua tuuina mai se Tulafono ua tapenaina. E i ai le talitonuga o le a mafai ona faamalieina ai manaoga o lea sa mafua ai ona faatupu lenei lagona, po o lenei foi faamoemoega o le Malo i le tuufaatasia o le auaunaga faapea ma le Pulega Faasoifua Maloloina.

25 IANUARI 2019

**Tulafono Tau Faaofi o Teuteuga o le Tulafono o le Soifua Maloloina 2019
– faitauga faalua**

Lau Afioga i le Fofoga Fetalai, ou te talitonu e le o toe po se lilo i le silafia i lenei faamoemoe, o lea foi e pei ona talanoaina i tatou faatalatalanoaga lenei le faamoemoe o le Tulafono lenei. E leai se faamoemoe faapea ina ia toesea ai ni auunaga po o tagata faigaluega po o nisi lava tulaga. O le agaga lava o le Tulafono ina ia siitia le auunaga e ofoina atu i o tatou tagata, e ala i le lelei pulea faapea foi ma le faatinoina o le auunaga e tuuina atu. O le manatu ua taiala i le faamoemoe lenei, ia faaitiitia le tuuina atu o a tatou gasegase i atunuu mamao, faaitiitia ai la tatou seleni e faaalu. Ae le gata i lea e siitia foi le quality of life i tagata i o tatou nuu i tua, faapea foi afioaga o lo o taumamao ma le falemai, e ala lea i le tuuina atu o le auunaga i nuu i tua, e toe faaleleia a tatou falemai faaitumalo, faapea foi le tali atu i le manao lea e faapea ona faaleoia i le aso ananafi e le tele o sui usufono. O manaoga ua leva, falemai faaitumalo ina ia faaleleia, ia i ai fomai ma le auunaga i falemai faaitumalo. Ma o le agaga foi lea o lea ua talitonuina e le faalapotopotoga o le soifua maloloina o le lalolagi, o le a mafai ai ona faaitiitia faamai nei le pipisi, lea e pei ona afaina tele ai o tatou tagata. E pei foi ona tatou talanoaina i le aso ananafi tulaga i le faamama toto. E mafua mai faamai ogaoga e pei o le suka, o le cancer, toto maua luga, o le mai fatu. O le agaga tonu lea ma le autu o le faamoemoe lenei, ina ia mafai ona faatino lea tulaga. O le tulaga e faalototeleina ai le faaauauina o lenei faamoemoe, ona o lea ua lagolago mai foi le Faletupe o Asia, i le taumafaiga ma lea faamoemoe o le Matagaluega o le Soifua Maloloina, ma le fuafuaga a lo tatou Malo e tuuina mai lo latou tauau tatou te galulue faatasi, e amata atu i le tausaga lenei. O lea la ua ogatasi le futia ma le umele i le faamoemoe lea o lo tatou Malo mo le faamalosia o auunaga i nuu i tua. Ma o le a maua ai foi le avanoa e tapa ai le galulue faatasi ma o tatou tagata community participation. E amata atu lea i le faamalosia o tatou Komiti Tumama, e pei ona faafofoga foi lo tatou atunuu o talanoa atu ai i luga o upega faasalalau. O le agaga lea e o faatasi uma, e tofu ma le sao i le faamoemoe lea e tasi, ia tuuaitiitia gasegase le pipisi, ia faaitiitia le auina atu o tatou tagata i atunuu mamao, siitia le auunaga i totonu o lo tatou atunuu.

Lau Afioga i le Fofoga Fetalai, o le agaga lena o le Tulafono lenei. E leai lava se mea e atoatoa i lona amataga, ae ua i ai le talitonuga o lea ua lava tapena la tatou Matagaluega e faatino le faamoemoe lea. O lea la ua tuuina mai loa le Tulafono lenei, a i ai le lagolago ma le finagalo....a lo tatou Palemene, o le a mafai loa ona pasia le Tulafono, ma amatalia loa ona faatino le faamoemoe lea i le tausaga nei lava.

O le faaaliga lea ma le agaga faaaloalo, mo le faamalamalama atonu e auiliili atu i se taimi, a i ai nisi vaega e lagalaga i totonu o le tatou faatalatalanoaga, ia e fiafia lava e tali atu i ai. Ma le agaga faaaloalo lau Afioga i le Fofoga Fetalai ma le mamalu o le Fonotaga.

FOFOGA FETALAI: Malo faafetai. Se i tulai mai le Afioga i le Palemia.

25 IANUARI 2019

**Tulafono Tau Faaofi o Teuteuga o le Tulafono o le Soifua Maloloina 2019
– faitauga faalua**

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: E pau lava le mea e tulai atu ai, o au e faalemalamalama i mea ia o faamai e le pipisi. Aua o faamai e le pipisi mo matou nei e le o ni fomai, o lona uiga o mai ia tatou te fiafia tatou te o e mamai ai aua e le pipisi. O lea la i le alii fomai po o faamai oti ia lea e te taua, lea e toatele tagata e feoti ai? Atonu ua tataua ona sui le faaupuga, ae faasamoa sao ia mai uma ia e tele tagata e feoti ai tatou o faamai oti, aua le toe faaogaina lea upu o le faamai le pipisi. Aua o faamai le pipisi a faafogafoga mai le atunuu, ðae se e manaia faamai ia tatou te o tatou te mamai ai aua e le pipisi ona fiu lava lea o le Soifua Maloloina e faasalalau latou polokalame e taofi ai faamai le pipisi e leai se isi e fia faalogo i ai. Ae o lou tulai atu e faataua le Tulafono leni. O le Tulafono leni, e tusa o lea ua toe faafoi ai lava le falemai ma le pulega i le mea sa i ai muamua. O lea ou te tau matau ua silia nei ma le tausaga talu ona fai le iuga e toe fai suiga nei, ona o le tele o faafitauli na feagai ma le pulega a le falemai. Sa tele lava ia suesuega faapitoa po o komisi, e tau fofo faafitauli na tulai mai pea i le aoatetele o le auaunaga tau le soifua maloloina. O le tele la o fautuaga sa i ai i aso na, e lelei ona tuueseese mea ia e lua. E lelei mafaufauga theory. A tuu ese lava le pulega ona lelei ai lava lea o le faagasologa o latou galuega. A tuu ese le pulega tuuese le auaunaga faapitoa, sologa lelei ai lava lea o mea. Ae na mafua ona tatou maua mafaufauga ia, o expert foi ia na tatou aumaia mai Niu Sila, aua o la foi ua alu ai Niu Sila i le suiga lea. O le manaia ia o tulaga ia i le faalemafaufau. A tuu ese lava fomai e gaoioi lava latou i la latou galuega, aua le pule mai fua le pulega aoao i i le auaunaga faapitoa faafomai. Ae vaai lava le pulega lautele i mea lautetele. O le mea la ua tupu i le eseese o mafaufauga ma le eseese o le faatinoga. Tuu mai loa i i le faatinoga ua atili ai ona oti, ua le agai i luma le auaunaga ae ua solo i tua. Ae faatoa tatou tetei ai foi i i ina ua o mai ia isi mai fafo talanoa mai ma faapea mai. ð Se o atunuu ia o le lalolagi o lo o latou faataitaia faiga ia, o Peretania, kopi loa i ai Niu Sila kopi loa i ai outou. O lea la ua toe see ese Niu Sila mai le mea lea ua matua leaga atoa ai le tautua i o i Niu Sila. O la ua toe see ese, ae o lea e taupe ai lava tatou. Ae se i silasila la i o Peretania, o Peretania la i le auaunaga faasoifua maloloina, o Peretania lava le atunuu e pitosili ona pau le mea la e i ai, i le tulaga o le auaunaga faale-soifua maloloina. O lea la, i atunuu uma lava o Europa, o Peretania lava e pitosili ona pau aemaise o lea e malamalama lelei i ai savali mai faletupe o le lalolagi, o latou ia e gafa ma le faatupega o auaunaga eseese faapenei a malo uma o lo o sulufai atu i ai latou mo fesoasoani tau tupe, o lea latou te malamalama lelei i mea ia.

O le tulaga lena o lea na tupu ai se manatu, e sili ona tatou see ese loa. Ua leva ona tataua ona tatou see ese ua tele naunau le faitio mai o nuu i tua e le lelei le pulega. Ona fai ai loa lea faatalanoaga, o lea la ua taoto uma mea o le a faatino, ae tetea loa ia nisi o teine tausimai e le o le faalapotopotoga uma a tausisoifua, na o nai tamaitai lava tausisoifua toaititi lea na faasalalau mai la latou tetea, e le auai uma le asosi a tausisoifua.

25 IANUARI 2019

**Tulafono Tau Faaofi o Teuteuga o le Tulafono o le Soifua Maloloina 2019
– faitauga faalua**

O le ala lena na ala ai ona valaau le feiloaiga ma latou uma ia, ona fai ai loa lea o le faaiuga, o le a faia se Komisi Suesue. O lea sa outou silafia faasalalaua i le fetotoai i le toe foi lava lea i le mea na sau ai tatou. Ae pei la ua manino, o le fetotoai ona e i ai le vaega e i luga e ono toe fetuunai tofiga ma e ono aafia ai. O le vaaiga la a le Kapeneta e lelei le toe tilotilo i le vaega tonu o lo o fetotoai ai. Ona fai ai lea o le Komisi Suesue, sau foi lea o latou lipoti, lena la na taoto mai ai ma le manatu o latou, o lauia lava lea na latou faia suesuega, fai mai o le mea lea ua tupu, ua tele le fetuiai. Pei ua alu lava le tagata ia, ua manatu ia i lona tofi ma lona totogi ae ua le vaai i le tautua i le atunuu. Ona sau loa lea o le faaiuga i le lipoti, e le mafai lava ona agai i luma le auunaga pe a le faamaoni i latou o galulue. O lea la ua i ai le fesoasoani lea ua faataoto mai e le faletupe. Afai e USD\$10miliona, o lona uiga e \$25miliona tala Samoa le latou sao i le faamoemoe. E tolu auivi na talia o le auivi lea e tolu faatulagaga (columns) e vaevae i ai, lea la e tete e i ai teine fomai. O le vaevaega muamua, e tulaga ese lava le pulega aoao latou. O le column lona lua, o le vaega lea i le toe faatulagaga o galuega i Motootua ma Tuasivi. Ma le vaega la lona tolu, o le auivi lea mo le auunaga i falemai i tua, falemai faaitumalo ma health centres. O le fautuaga la a le Komisi Suesue ua lava le lua o Vaega o le auunaga. Muamua, o le pulega. Lona lua, tuu faatasi loa Tuasivi i le vaega autu ma le tautua lautele, tusa la o i lea ua taoto ai le compromise lea ua aumai e fautua mai ai le Kapeneta, tatou alu ai loa i i ina. Ua lava le lua o Vaega o le auivi o le a l tolu ni Vaega. E taugofie foi. Lona uiga, ia faaleleia fale, faaleleia masini, tuu i ai ma fomai, ona maua loa lea o le tali autu, i mea ia e aumai pea e a outou Afioga, e tataua lava ona i ai ni fomai i tua, e le gata o fomai, a o tausisoifua, e aua ai ne i toe tutupu mai mea ia na malilili ai fanau ia e toalua i Savaii. Ma so o se tui, e tataua lava ona vaai i ai fomai i mea ia. I le tatou lea faataua e toe faatalitonuina ai tina o le atunuu e l toe tupu mai mea ia na tutupu na feoti ai pepe ia i Salafai, ona e pei ua tuufau lava tausisoifua e faatino tuiga nei.

O le tulaga la lena mo le silafia, lea e mafua ai le toe tuufaatasiga lena o Vaega Tetele o le pulega faale Soifua Maloloina ma ua tuu mai foi i ai le lagolago atoa a le faletupe o le lalolagi i luga o le latou fesoasoani lea e aumai e uunai ai mea nei i te i ua faapea o le faata le mea lea e saunoa i ai le Minisita. E le o se faata. Ma o le tulaga la lena, tatou alu ai i le mea lea, o le tali lea o talosaga e aumai pea, aumai pea i totonu o le Maota lena i fonotaga e tele i aso ua tuana'i, ona e le faapea e fai taavale uma tagata uma e mafai ai ona aumai le tagata i Apia ona o le talitonuga, tatou o i Apia ona o la e i ai fomai. O le a matua aveese ai lava foi le soona tumutumu vale o le falemai i Apia ina ia taofi ai i tua tatou tagata mamai ma togafiti ai aua o lea ua i ai fomai i tua ma ua faaaupegaina foi i masini faaneionapo. Ae le gata i lea o lea ua agai atu ina fesootai uma uaea ia, le internet ina ua faaleleia atoa le tautua o fesootaiga televavave, e le gata i totonu o le taulaga a o afioaga foi i tua.

25 IANUARI 2019

**Tulafono Tau Faaofi o Teuteuga o le Tulafono o le Soifua Maloloina 2019
– faitauga faalua**

Lau Afioga i le Fofoga Fetalai, ia o lou toe faaopopo atu lena ona o le taua tele o le mea lea, ua leva ona fia take off ae ua fai sina tuai o le Minisita ma lana Matagaluega i le vave ona aumai i totonu o le tuufaatasiga ua leva ona fia alu saosaoa le tatou taavale. O lea la ua silasila mai, na ona amata lava o le tatou Fonotaga kick off loa le mataupu lenei ona o le taua tele.

Lau Afioga i le Fofoga Fetalai, o le toe faaopopo atu lena i le taua tele o le Tulafono Tau Faaofi lenei ua matua tuu atu i ai tauau o le Kapeneta atoa.

FOFOGA FETALAI: Malo faafetai. Oi, ia, o lea e tulai mai le sui usufono mo Anoamaa Sisifo faamolemole. Tulai mai le sui usufono.

Tofa Hon LAUOFO FONOTOE NUAFESILI PIERRE LAUOFO (Anoamaa Sisifo): Faamalo faafetai i lenei taeao, ou te manatu o lea ua maea foi ona e osi le taulaga e tapuaia ai o tatou faiva i lenei foi aso Fono. Ona i ai lea o le manatu o lele ua tea i lagi le fetu tai matagi ua motu foi i le vasa le suigaula nai le papa. O paia foi o le atunuu e le toe oo i ai so matou manatu, ua taoto a o se alaoo.

E faafetai atu i lau Afioga i le Minisita mo le Soifua Maloloina i lenei foi Tulafono Tau Faaofi fou ua saunia. E momoli atu foi le faafetai i le Afioga i le Palemia i le saunoaga malamalama e faamanino ai nisi o vaega o lo o taumafai nei ina ia siitia i se tulaga lelei le tatou soifua maloloina i totonu o le atunuu po o le auaunaga foi. Ia atonu o le mea lea e moomoo lava i ai tatou. Ma i lou foi sui usufono ou te lagolagoina lava se suiga mo le lelei, a o le siitia foi o se auaunaga maualuga i se tulaga lelei, aemaise lava le Matagaluega lenei o le Soifua Maloloina, ona o lea tatou te talanoa i le soifua o tagata po o le ola o le atunuu. O lea la ua faatauaina lenei foi faamoemoe, toe tuufaatasia le o le NHS ma le MOH. O lea la ua faamauiina e lou sui usufono le saunoaga a le Palemia ua maua mai nai vaegatupe mai faletupe o le lalolagi, o lea sa taua le \$26miliona e fesoasoani ai i lenei polokalame ua amata ona faatino. Ia e taua lava le tepa i tua lea foi sa saunoa le Palemia ma le Minisita i mea foi sa tatou sau ai i ia tausaga ae le i tuueseeseina lea, a o lea o le a tatou toe foi i tua. Ia ae pei e faalogologo atu lava i le tulaga e i ai, atonu o le eseese a mafauauga a o le faatinoga foi o auaunaga, aua o nei lava mea o le structure, o le systems, o le faiga e faatino lava e tagata soifua. O latou lava la tatou te faamoemoe i ai mo le lelei o le faatinoga o auaunaga. Ae na ona ou toe tepa atu lava i tua i nai tausaga ia ua tuanai atu, toe faasao mai au lau Afioga i le Minisita mo le Soifua Maloloina, masalo o le 2012, 2013, oo ma i le 2014, sa ou matauina i lipoti faaletausaga a le NHS le mauaina ai o tupe faasili, tupe sa aoina ma i auaunaga eseese i totonu o le health sector. O lea foi ou te tau manatua pei o le 2015, sa i ai le tupe sa teu faavaitaimi a le NHS pe \$1miliona i totonu o le ANZ. E pei la o vaega ia, na ona ou toe tepa laitiiti lava i tua faapea, a o le agaga lea e maua atu i le Tulafono, o se agaga lelei mo le agai i luma ina ia lelei ma siitia i se tulaga maualuga le auaunaga faa-soifua maloloina.

25 IANUARI 2019

**Tulafono Tau Faaofi o Teuteuga o le Tulafono o le Soifua Maloloina 2019
– faitauga faalua**

E pei lava o lea foi sa matauina, pei o mea ia sa aumai i totonu o le Palemene. E pei lava o le 2015 sa maua ai sina siitaga a le aufaigaluega a le Soifua Maloloina, ia o tupe lava sa aoaoina mai totonu o le latou sector. Aua e pei foi sa manatua, o le faiga lea e sau ai le NHS, e pei sa pulea i lalo o le board po o se komiti, pei o latou ia sa faafoeina le latou foi auaunaga. O lea la ua aumai le finagalo o lau Afioga ma le Malo, toe tuufaatasia la vaega ia e lua pei ona e saunoa i ai ma saunoa foi le Palemia. O lona uiga la, e foliga mai o tupe ia o le a aoina e le tatou health sector o le a ave uma i tai i le vaitele i le Treasury. Ia ou te le fai atu la o se mea leaga, ae pei o le faiga lea o le a tulai mai, o le a toe foi lava i le taimi e faasoa ai le keke a le Malo ona toe o foi lava lea o le Matagaluega e finau mo se latou share mai totonu o le tatou keke lea. Ia ae ese ai mo le agai i luma, aua o lea ua faamauina e \$26miliona le tupe a le faletupe o le lalolagi lea o le a aumai e faatinoina ai le tatou faamoemoe lea. E faapea foi la i le aufaigaluega, aua o lea e pei e matau atu i le Tulafono, o le a toe foi uma i lalo o le PSC, ae pei sa i lalo o le komiti foi lea sa i ai muamua o le board. O lona uiga e toe foi lava i le mea sa masani ai i faiga faavae a le PSC, tofiaina o le aufaigaluega. A o lea foi ou te manatua le saunoaga a le Palemia i se tasi o Aso Fono, o lea e i ai le taumafaiga lea e taumafai e latou o le a faamatuu i tua i CEOs ma Matagaluega le malosiaga e faafaigaluega ai tagata ma faamaloloina ai tagata. Atonu o lena e faagasolo lena faamoemoe i lenei taimi. Ao le taimi lata mai aua o lea e aumai i le tulaga faanatinati le Tulafono lenei, o lea la o le a toe foi uma i lalo o le PSC mo le taimi nei. E faamalo atu, ae pei ona ou talanoa i vaega ia i suiga ia ou te tau vaavaai atu i ai. O tulaga la i aufaigaluega vaea, aua o lea o le a tuufaatasi vaega ia e lua, o lona uiga e le taumate o le a i ai nisi o latou o le a vaea (redundant). E pei o i e auala atu ai se fesili lau afioga, aua sa ou fesili i le tulaga i le Tala Faaopoopo o le Tupe, po o i ai se tupe mo tagata ia o le a redundant mai Matagaluega ia. Ae peitai e pei e foliga mai o na e i lalo o le tupe faaagaga mo siitaga o totogi e \$3.7miliona. Atonu o le tulaga lena, atonu o le a i ai foi ma se fesoasoani mai le tupe lea o le faletupe o le lalolagi mo i latou na o lea o le a redundant. Ae pei o le tulaga lena, ona o le manatu alofa foi ia i latou ina ia aua ne i faaletonu le tulaga o le motusia o a latou tautua ona motusia ai foi lea o a latou seleni.

Ae o vaega taua ia lau afioga i lau vaavaai atu i le suiga lava lea o le a tatou i ai. E pei lava na ona toe sui lava i tua e pei ona saunoa le Palemia i le mea sa o tatou o mai ai i tausaga ua tuanai atu. E pau lava le isi tulaga o le vaega lea o le a redundant, pe e i ai se avanoa e toe talosaga mai ai i totonu. Aua o lea e pei e tau maua, e te lei saunoa i ai lau afioga, ae pei e tau maua i le faalogo e faapea e i ai le stand out period pe lua ea tausaga. Ae o lea foi ou te nofo ma ou tilotilo i la tatou Matagaluega e i ai avanoa foi ia, o specialized skills e ono faigata ona faatumuina. Atonu e i ai foi nisi o lo o i ai i le taimi nei, ae pe o i le vaea lea, ae manaomia foi le toe rehire mai, pe a faapea e fai atu au fuafuaga ae e le o maua se isi e agavaa i lea avanoa. E pei o isi vaega na lau afioga, ao lea e aumai le faamamafa, faafetai o le faamamafa e ave i tua i o tatou communities.

25 IANUARI 2019

**Tulafono Tau Faaofi o Teuteuga o le Tulafono o le Soifua Maloloina 2019
– faitauga faalua**

O moomooga foi na o lou sui usufono e fia maua se auaunaga e siitia ai i luga le lelei, o le tatou health i tua i itumalo faapena foi lenei itumalo lau afioga. O le tulaga lava ia e pei ona tau vaavaai atu i ai. O lea ua saunoa le Afioga i le Palemia i le tui puipui, ma taumafai e.... po o le faiga lena o lea ua i ai nei, e tataua ona i ai se fomai. E i ai isi mea ia pei e tau matauina nei e si nei itumalo, e pei a taunuu atu le fomai e ave le faamuamua i gasegase o lo o i ai. Ona o lo o i ai foi nisi o tau tigaina, ona ave lava lea o le faamuamua a le fomai, ae faatali uma nai tina ma fanau iti, seia uma galuega a le fomai i le vaauga o gasegase ia ona faatoa faasolo lea o le tui. Aua e tataua onaí aua o aso ia, o lena lava e silafia sa faatino e tamaitai tausisoifua ia le immunization program. Ia e le tau faatali i se fomai, ae ona o tulaga foi ia e pei e malaga mai le isi itumalo, ona agai lea i le centre ona maua lea i le mea lena o le faatalitali, O le manatu alofa i nai tina ma nai fanau, o le umi ona faatalitali i isi aso pe afai e pisi le fomai, seia avanoa le fomai ona faatoa faatino lea o tui. Se i silasila ane lau afioga i le tulaga lena, pe i ai sina auala e tau foia ai ma taufaatelevave ai, ina ia vave foi ona toe o atu nai matua, po o nai tina ma fanau i o latou aiga.

Lau Afioga i le Minisita, ona oo mai lea i le tulaga lea o le agavaa, o lea ua ou tilotilo atu i le Director General po o le Faatonusili o le Matagaluega. O lea ou te tau vaavaai atu i agavaa, malo faafetai. O le agavaa lea e aumai mo register health care professionals. O le health care professionals o lo o faamatalaina mai i lalo o le isi Tulafono lea o le health care professionals registration and standards. O i latou la nei o lea e lisi mai i i e agavaa mo le tofi lea Director General. E i ai le fomai pasi, fomai fainifo, o le tamaitai tausisoifua ma le midwife, o le talava'i po o le pharmacist, ona i ai lea ma i latou uma o lo o i lalo o le carelife health care professionals. O latou na e i ai iaí o tagata nei lea e faagaioia le faata a le falemai, mo tagata foi ia e tau aoaoina le gagana po o le tautala a latou o gasegase ae ua faaletonu le tautala. Ua i ai ma dieticians e vaavaai le diet o le taumafa ia paleni, ona i ai lea ma taulasea Samoa, ona i ai lea o fomai faatosaga Samoa. Ua toatele lava tagata ia ua agavaa mo lo tatou tofi lea o le Director General of Health.

O lau la faafetai i lau afioga, o lea ua tatala i le lautele ia avanoa. O ai na iluilu talotalo e agavaa nai taulasea Samoa e apalai i lenei tofi o le Director General of Health. O ai na iluilu ma talotaloí . Faafetai i lau Afioga i le Minisita ua tatala le avanoa.

FOFOGA FETALAI: Tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, o se mea e fia faasao. O saunoaga foi faapea o lea lava tatou te iloa e faavalevalea le manatu. E taofia ai loʻu alu atu nei i le ofisa ae tu atu foi se talosaga a se loomatua, o faamolemole e fia maua sau taavale e amata ai ona ou fealuai i le va o i ma utaö.

25 IANUARI 2019

**Tulafono Tau Faaofi o Teuteuga o le Tulafono o le Soifua Maloloina 2019
– faitauga faalua**

E ala ona ou fai atu, o au lea e toai mai ai le tele o le au taulasea Samoa, e peiseai o au lea e faaigoa e le toatele foi lele ma fesasiai ai lava, o au o le tama o le atunuu. So o se faafitauli e tupu ae o le manatu lava lea tatou o i le tatou tama. E i ai foi la le talosaga a i latou ia na aumai ia te au, e fia ave atu se fale fogafale atoa mo le au taulasea e fai ai a latou galuega, o le galuega o le fofo o latou ua tiga papatua. E moomia ai e latou se fale atoa. O laʻu tali o ane e vaai le Ofisa Sili o Pulega a le Turisi, e avatu se fale atoa. O le fale lena e agi faasoloatoa ai le matagi tou te manavaina ai le ea lelei mai le sami. Ua pule nei i le falesamoa atoa. La ua pei ua tau tutulu le fale, la foi ua ou fai i ai i le Ofisa Sili o Pulega õse talanoa oulua ma le Minisita, fai i le toeaina e vaai le fale lena o la ua tutulu, toe ato le fale lena e i ai nai fofo e latou te fia faaogaõ. Ou te alu atu foi au ou tifa i ai e fofo ai ou vae, ae se i outou alolofa faaoga nai loomatutua na. Ae e le mafai ona tupu le mataupu na laga e le sui usufono. O la e i ai taiala e faataoto ai mea faapenei. O le matua toilalo popo o le Minisita ae alu atu o la ua nofonofo mai ai se loomatua ua Ofisa Sili. Ae taatia mai pea e i ai le taimi e tali atu ai le Minisita.

Ae pau lava lea o si mea lea ou te tulai atu ai, ua uma ona fai le iuga a lo tatou Malo, masalo e le o toe mamao, ona aumai foi lea o Tulafono e faatino ai le faasee ese o le PSC, ina ia toe faatulaga o latou tiute, ina ia avea ma se faalapopotoga e faapitoa i mataupu tau training and improved capacity o tatou tagata. Ia faatulaga a latou polokalame mai lava ia Ianuari e tau mai ia Tesema i semina ma workshops e pei ona fai e le tele o atunuu, ina ia faaleleia atili ai le malamalama i galuega eseese. O lona uiga e i ai lava tagata e poto faapitoa e faatulagaina o tomai ia moomia mo le aoaoina ai o tatou tagata. O le mea lea e tupu nei i le lalolagi, aemaise le taimi lenei o le fesouaina o le lalolagi, o le tulaga lea o le suiga o le tau. O mea tetele nei o lea e manaomia e le atunuu, e le gata o seleni mai fafo e faatino ai a tatou galuega. Ao le vaega lona lua, o le transfer mai o le technology mai atunuu ia o lo o i ai le technology, tekonoosi. Ma le vaega lona tolu o le capacity, o le tagata e poto faapitoa e faatinoina ia galuega eseese, e faaauppegaina ai le atunuu i galuega e tatau ona fai. E oo mai la i le taimi lenei o lea ua matauina e lo tatou Malo, ua agai lava ina televave tele ia le faamanuiaina o tatou i sailigatupe. Ao le mea lea e tau tuai ai, o tagata e i ai tomai faapitoa, aemaise lava i le itu lea o le tusiga o ata, ma le faatinoga o galuega faainisinia ma le vaai, e pei la o le faagasologa o galuega. O le tulaga lena o lea e mataitu e le Malo i le taimi lenei. Aua e tatau loa ona tele atu se taimi o le PSC, ia faaleleia ai o tomai e auala i semina workshops, aumai tagata e i ai tomai faapitoa latou te faatinoina. Ae o le tulaga i le hire and fire, e lafo atu pea i le Ofisa Sili o Pulega o Matagaluega ma Faalapopotoga taitasií o le tasi lena faitioga lea e i ai nei, o le tofi o tagata ae e le o ni tagata e i ai ni poto faapitoa. E le tupu i taimi uma, ae i ai taimi e fesiligia ai le tulaga lea. E tatau ona o mai tagata e i ai le tomai faapitoa latou te faatalanoaina avanoa, na tofi ai lea o tagata e i ai lo latou tomai faapitoa i i, i le faatinoga o galuega. O lona uiga la lau Afioga i le Fofoga Fetalai, e le o se mea tau mate.

25 IANUARI 2019

**Tulafono Tau Faaofi o Teuteuga o le Tulafono o le Soifua Maloloina 2019
– faitauga faalua**

E taua tele le finagalo o le sui usufono ua faaalua, o mea lava ia e taua tele na ia aumaia o lea ua address e le Kapeneta. Ma e le o se mea taumate le tulaga lena i suiga e le o toe mamao, ona aumai foi lea o teuteuga o le Faavae, ina ia faatino ai ma maua ai le tali o faafitauli ia e tupu i le taimi lenei. O lea e pei o lo o atagia i le saunoaga a le sui usufono. O lea o lo o ia aumaia ai lona atugaluga, òo le a toe pule foi la le PSC. Le a taoto le faamoemoe o le a faasee ese le PSC i ona tiute fou e toe faatulaga. O fuafuaga na o i ai nei. A o tulaga lava ia i le mafuaaga o ia atugaluga o sui usufono i le PSC, e le gata o le pulega a o totogi. O le pulega ina ia talafeagai tagata e tofia i le pulega ma talafeagai foi ma totogi. O lea la ua avatu le tali. O suiga tetele nei e le o ni tamai suiga lau afioga. Faafetai foi i le saunoaga a le sui usufono, ua maua ai ma le avanoa e faamatala auiliili uma atu ai fuafuaga mamao a lo tatou Malo. A o le vaega lona lua i totogi, o lea ua uma ona taoto le alafua e fua uma ai totogi. Ua i ai le Tribunal le itutino e faatulagaina faapitoa totogi o Vaega uma o le Malo. Ina ia silasila totoa i le tulaga, e tatau ona faataoto ai totogi ia vasaga lelei totogi uma o tatou aufaigaluega. E tatau foi ona silasila totoa i latou i tomai faapitoa aua e i ai lava le taimi e faapea mai ai, e tatau ona competitive, e tatau ona marketable. O lona uiga o lea mea, fua tau lalata tatou totogi i le mea o i ai fofai i atunuu i fafo.

O le taimi lenei, ua maua luga totogi o latou o la e galulue faafomai. Ae o le tulaga la lea mo teugatupe, o le a la le tulaga o le a i ai ia teugatupe? E tatau ona faasilasilaina le mea lea leaga o le ki atoa o galuega fuafua o le tulaga tau tupe e faatino ai.

E i ai le fonu sa valaauina, le fonu lea a le Kapeneta po o le Cabinet Development Committee. Ia ona laulau mai lava lea e 1 foi sa Ofisa Sili i le Matagaluega o Tupe, ua fai si lea, lea ou te taumanatua nei ua toetiiti atoa le 18 tausaga. Ona talatalanoa mai lava lea o le tala lelei o lea ua i ai ia le tatou tupe faasili, fesoasoani i tatou teugatupe \$25miliona ona patipati lava lea o e uma sa auai. Ona ou talanoa loa lea i faalogo mai la outou na, outou uma ia o Ofisa Sili o Pulega, o se mea valea tele le mea lena, o le uma na faataoto atu tupe e faaalua ae aumai ua i ai le faasiliga, \$25miliona ua le faaogaina, o lona uiga, o le \$25miliona foi lena o auala ma falemai ma aoga, e le i faatinoina. O lona uiga, e i ai ia Ofisa Sili o Pulega na sa momoe ae e le faatinoina ia latou galuega.

O le mea moni lava o le 100% o le faatinoga o le paketi, afai e \$800miliona na fuafua e faaalua, ia oo atu i le faaiuga o le tausaga ua faaoga uma lava le \$800miliona. E le o se mea lelei la le mea lea o le sefe o tupe. Afai na fuafua ia le \$100piliona e faatino ai galuega, ia oo atu i le aso e faai ai le tausaga, ua faaalua foi le \$100piliona. E le afaina pe afai e ova atu ma le \$100miliona ua faaalua. Ua ova. Ia manatua foi o isi mea na e fai e isi Malo, to create ia employment opportunity, e manaia foi le faa deficit o le budget. O le mea lena e fai e isi Malo, o le faaova o tupe faaalua, ia aua o le iuga o tupe faaalua, o le tele ai lena o le faagaioiga o le economy. O lona uiga ia paleni mea uma, o tupe na fuafua, ia faaalua uma, a i ai foi sina faasiliga ua ova atu ai le faaalua, e le o se mea leaga aua o le iuga o le mea lena, e tele tagata ua manuia... ua fai ia latou auala ae le i fuafuaina.

25 IANUARI 2019

**Tulafono Tau Faaofi o Teuteuga o le Tulafono o le Soifua Maloloina 2019
– faitauga faalua**

Ae e mafai lava la ona toe faatumu mulimuli, ae o le tulaga lena, ou te tali atu ai, e le o se mea lelei foi le i ai o ni tupe faasili afua i le l faaalu o tupe ua fuafua e faaalu. O le tupe lava na fuafua, ia faaalu uma mo le faatinoga o a tatou galuega. E na o le pau lava lena o le mea lea sa ou tulai atu ai ona o lea ua ou vaai atu o lea ua oo i le taimi o le tatou malologa.

Tofa Hon LAUOFO FONOTOE NUAFESILI PIERRE LAUOFO: Faafetai lava i lau Afioga mo le faauilavea, lau Afioga i le Fofoga Fetalai...

FOFOGA FETALAI: Tulai mai...

Tofa Hon LAUOFO FONOTOE NUAFESILI PIERRE LAUOFO: Ia se i silasila ane la lau Afioga i le Minisita mo le Soifua Maloloina, e pei lava ona outou faafogafoga mai, o lau lava lauga o le lauga faafetai ma le faamalo. Ae silasila ane lau Afioga i le Minisita mo le Soifua Maloloina, ona o lipoti faaletausaga lea na ou tago atu lea e aumai i i, lea na aumai i totonu o le Maota lena e i ai ia tupe teu faavaitaimi, tautuana e fautua i le Matagaluega e faaoga uma tupe. Aua le toe teua ae faaoga mo le faaleleia o le service a tatou.

Ia o le agavaa lea sa ou talanoa i ai, lea ua faaii atu, pau lava le mea o le lau atu o agavaa lea e i totonu o le Tulafono, lea e o mai ma Taulasea Samoa, ia pau lava lea. E le o se manatu, o le Tulafono lea e lau atu, ae na saunoa le Palemia e faavalevalea le manatu, e le o sou manatu o lea e lau atu le Tulafono. Ia ae silasila ane, atonu e tasi lea mea e silasila i ai mo agavaa, aua le agai i luma, e i ai se isi tulaga teuteu e toe aumai i se isi taimi.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai...

FOFOGA FETALAI: Tulai mai le Palemia...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: O so o se mea uma lava e aumai ai agavaa, aua ne i galo ia i tatou, a faatino loa galuega, ia i ai le faautautaga tatau i le faatinoga o galuega. Po o le a lava le mea tatou te faia, e le mafai ona aveesea ai le faautautaga tatau. O lona uiga o na agavaa, e oo loa ina saofai ia le Komiti e fautuaina, usually po o le toatolu po o le toafa, latou te faia le fautuaga, ona aumai loa lea i i, i le Komiti o le tumutumu o Komiti uma lava, o Komiti uma a le Malo le Kapeneta lea e 13 faiai ia e faatalitali atu i le Kapeneta. Na ona aumai lava e faaletonu, sapelu loa, e iu lava ina sapelu atu ai ma le Komiti lea na latou faia. O le mea la lea, e leai se mea e popole ai.

E i ai le upu foi lea faale-Tusi Paia, o le mea o le tomumu mai lava o le nuu o Isaraelu, ia alu atu ia le fautuaga a toeaiina, -ia aua tou te popole, o lea e i ai ia Mose ma Arona ma latou uma, latou te faia mea umaø

25 IANUARI 2019

**Tulafono Tau Faaofi o Teuteuga o le Tulafono o le Soifua Maloloina 2019
– faitauga faalua**

E manatua foi e na o le fitu lava aso ona savalivali mai le vaega lea e o i o, ia Mose ma latou uma e o i o i le Nuu na folafolaina ae faatamilomilo lava e le Atua i le toafa mo le 40 tausaga. Ae o le a le iuga na oo i ai, e 603 afe na o mai, ae na o Kalepo lava ma Iosua na oo i o, feoti uma lava i i, e oo lava ia Mose ma Arona, e le i oo i o i le nuu paia, ae na o Kalepo lava ma Iosua na pai i o i Isaraelu ma fanau uma lava a latou ia. O le mea la lea, aua le popole, o la e i ai Mose ma Arona ma latou uma e vaaia mea ia.

FOFOGA FETALAI: Ia malo, malie le sui usufono...

Tofa Hon LAUOFO FONOTOE NUAFESILI PIERRE LAUOFO: Lau Afioga i le Fofoga Fetalai, e leai sou popole, ou te le o popole. O lea e fautua atu i le Minisita mo le Soifua Maloloina, a i ai se isi e popole, e tataua ona popole le Minisita, e le o au e popole. Lau Afioga i le Minisita, e pei o lena se tulaga e faaoga le faautautaga tataua, pe a oo ina tofia ia... e mafua lava ona ou pai i lea mea, ona o le Tulafono, e le mafai ona alo ese ai. O le Tulafono lava ia o le Tulafono, ia tau ina ou faapena atu, ae silasila lau Afioga i lena vaega.

FOFOGA FETALAI: Lau Afioga i le sui usufono mamalu, leaga o lea ua tatou toai taunuu i le tatou malologa masani.

Tofa Hon LAUOFO FONOTOE NUAFESILI PIERRE LAUOFO: Ia o le Tulafono lena ma le mea ua fai, tau lava ina ou faapea atu i lau Afioga, o lau legacy lena, iu lelei pe iu faale-lelei, o le legacy a lau Afioga, ae ou te tatalo ia iu lelei, ia aua le atunuu ma le soifua maloloina. Manuia le fono.

FOFOGA FETALAI: Malo faafetai, ia manatua foi o le tatou Palemene e faapena lava, e faalagolago mea uma i le finagalo o le Atua e aumai ai le faautaga tataua, e faafoe ai ia Faigamalo. Ia aua e le faapea o le a tuuina ai o le a se tulaga e aoga foi fautuaga e timata ai le upega mo le lumanai. E faalagolago i le faautautaga tataua e aumai e le Atua e faafoe ai mo mea nei o Faigamalo, Matagaluga ma Pulega.

Ia e matau atu e toatolu sui usufono ia e fia saunoa, e fia ni sui usufono e fia saunoa i le mataupu, leaga o le mataupu lena ua leva ona taoto i malae ua tausaga i le 18 masina. Ia ailoga e toatele nisi ia fua i ai galuega o lena tausaga, ia 1, 2, 3 o ia na o le toafa. Ia lelei o le a maua avanoa o sui usufono pe a tatou foi mai i le tatou malologa masani. Ia manatua foi o le aso puupuu lena, tatou te maea i le 12:00, ia e mafai la ona toe tuutuu atu ia le tatou galuega nanei i le 7:00 i le afiafi pe a faapea e toatele sui usufono e fia saunoa.

Na faataatiaese Taulumaga a le Fono Aoa Faitulafono mo lana malologa masani i le itula e 10:35 ma toe amatalia i le itula e 11:07 i le taeao.

25 IANUARI 2019

**Tulafono Tau Faaofi o Teuteuga o le Tulafono o le Soifua Maloloina 2019
– faitauga faalua**

FOFOGA FETALAI: E le o po se lilo o le aso puupuu lenei e faamuta i le 12:00 e pei ona faataoto mai ai le faatulagaga o le tatou galuega i le lafo na faatuina e le Taitai o le Maota. Ia manatu foi e fua i ai ia lo outou finagalo i le tatou galuega i le 12:00. E maea le saunoaga a le sui usufono o Anoaamaa i Sisifo, tulai mai le sui usufono o Palauli le Falefa. Ou te tapa le sui usufono o Palauli le Falefa ona sosoo mai lea ma le sui usufono o Vaimauga Sasae.

Afioga Hon FAUMUINA TIATIA FAAOLATANE LIUGA: Faafetai i lau Afioga i le Fofoga Fetalai, faafetai foi o lea ua saioalo le tausiga lau Afioga ma le Afioga i le Palemia ma le Kapeneta ma Minisita Lagolago ma lenei foi itu, ia ou te iloa foi ua maua ia le faamalositino. Ia ona o le puupuu o le taimi e faapuupuu foi ma avatu na o mea aanoa.

FOFOGA FETALAI: Faafetai lava saunoa a le toe ulutaia o lena itu.

Afioga Hon FAUMUINA TIATIA FAAOLATANE LIUGA: O le bottom line lava o se manatu, ou te lagolagoina le Tulafono. Ou te lagolagoina foi le tulaga faanatinati na aumai ai le Tulafono ona o mea nei o le tuufaatasiga po o le faaitiitia o le faateleina o Matagaluega ma Faalapotopotoga, e aafia ai lagona o tagata ma le le mautonu. O le Tulafono foi lea ua toe faatulaga mai ai le Tulafono tuai, o lona uiga o le mea lava sa i ai, o lea o le a toe foi i ai, tusa ua toe faafai ia le Matagaluega i le faiga sa uluai i ai se i vagana ai teuteuga. O teuteuga la ia ou te vaai atu ai i le Fuaiupu e 19, lea e faapea e tuuina atu ia le malosiaga i le Minisita mo mea tau faaee atu.

O lea e feteenai ma le Tulafono na pasia i le tausaga na tea nei, o tau faaee atu e le toe faia i le pule a le Minisita, ae o le a fai e le Matagaluega ona tuu atu lea i le Revenue Board, ona fai ai lea e le Revenue Board le review ma toe fai ai ia le fautuaga i le Kapeneta, o lea foi e afio ai le Minisita e ona le Matagaluega. E pei o le agaga lena na aumai ai teuteuga o mea nei o non taxable revenues. E fautuaina ai le Minisita ma le Matagaluega, e toe teuteu le Vaega lea, aua o lea e feteenai ma le Tulafono na pasia e le Palemene, e ave uma ai tau faaee atu i lalo o le Matagaluega o Tupe.

Lau Afioga i le Fofoga Fetalai, o le lagolago malosi a lou nei sui usufono, ona o le faataua lea o le a ave, i mea o falemai faaitumalo, ma Komiti Tumama. Ma o le a le gata e fesoasoani i o tataou tagata i le mea lea o le femalagaai, ae o le a faapena foi ona avatu ai le auunaga lea, i o tatou nuu i Salafai e faapena foi i nuu i tua i Upolu nei. Faafetai mo le faatulagaga lea.

I le tulaga lea sa taua i le Afioga i le Minisita ma le Afioga i le Palemia, i le 3 pillars o le tulaga lea o le structure fou. O le matua manaia lava o le fautuaga lea, ae te i ua toe saunoa mai, o lea o le a tuu i le 2. E ala la ona ou popole i le 2, o le a overload ai le base lea e avea le auunaga. E tele loa galuega, e silafia foi e lau Afioga ma le mamalu o lenei Palemene, e overload loa se tagata i se mea, amata loa ona create mistakes. Ae e le tatau ona e faia ni mea faaletonu i le soifua o le tagata.

25 IANUARI 2019

**Tulafono Tau Faaofi o Teuteuga o le Tulafono o le Soifua Maloloina 2019
– faitauga faalua**

O le mea lena, e taua ai le faaauau pea o le 3 pillars pe afai e le mafai i le taimi lena o le Tulafono lea ua aumai, ou te talitonu e masani ona saunoa le Afioga i le Palemia, o le tonu muamua, o le tonu sao lena. Ae leaga ou te le o iloa po o le a le faavae, na toe tuu ese ai le pillar e tuufaatasi. Ae ana faataua le ave o le pillar lea i District Hospitals po o Health Centres, o le matua manaia lava. Na tuu ai lava lea o le isi pillar, e vaaia ia Motootua ma Tuasivi ia ma isi auaunaga ia ma le vaega o le Pulega, ia ae ui o lea, e avatu faafautuaga, silasila i ai, leaga o lea ua see le vaa o le Minisita ma ua uma foi ona fai le finagalo o le Kapeneta. Ae manaia le agai i luma, leaga e tataua ona lelei ona faatulaga.

O le isi mea lau Afioga i le Minisita, sa ou fesiligia i isi taimi ia le Matagaluega, ma le auaunaga i le tulaga i fomai o le a ave i tua. E tataua ona i ai ni mea e faaosofia ai ia fomai e o i nuu i tua, ia aua sa e i nuu foi i tua i aso ia o e laititi. Sa e fagota, e faapena foi la, fanafana lupe, sa toto au ufi ma au fai ma mea faapena, i le taimi a o e talavou.

O le mea lea e taua ai lava ia te au, le fai o incentives mo fomai nei e o i tua, leaga o lea e silafia e le fomai sa ui mai ai lona soifua auauna. O le mea o le isolation, e te isolated mai loa i lou aiga, ma faafiafiaga, you need something e spend ai lou taimi. O le isolation factor...

FOFOGA FETALAI: Toe lua minute o le sui usufono.

Afioga Hon FAUMUINA TIATIA FAAOLATANE LIUGA: Faafetai, e faataua ai le vaega lea, ona ou fesili lea, o a ni incentives e ave i nai fomai? Fai mai o le taavale ma le fale e nofo ai.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai...

FOFOGA FETALAI: Tulai mai le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: O le mea e faamalamalama o mea lava ia o lea ua saunoa mai le sui usufono o mea na e tataua ona fai. O le taavale, ia a leai foi se taavale o la e i ai le solofanua, ia po o le uilaafi, aua e i ai ituaiga uilaafi foi ia e tolu uili, tasi le uili i luma, lua uili i tua, ia po o le taavale lelei foi. Ia pau lava le mea lau Afioga i le Fofoga Fetalai, i aso la, sa i ai le tulaga lena o le tau leai o ni fomai. Ae o le taimi la lena i le tatou Aoga Faafomai foi lea ua i ai nei, o lea e i ai le faamoemoe o le a tele fomai. Ia ma ua tataua loa ona fai le mea e faatonu, e le tuua i le malie. O le tulaga lava ia o tagata faigaluega mea o faatonuga o galuega, a sau loa le faatonuga i luga e fai le mea lea fai loa. E ala ona tutupu mea na, ona e pei sa tau faanoioi, e le tau faanoia ia le tagata faigaluega a le Malo, e faatonu le tagata faigaluega a le Malo a musu faamalol .

25 IANUARI 2019

**Tulafono Tau Faaofi o Teuteuga o le Tulafono o le Soifua Maloloina 2019
– faitauga faalua**

FOFOGA FETALAI: Malo, ua manaia foi le fautauga ua maua ai le finagalo o le Malo e pei ona faamanino. Faamanatu atu foi e i ai le taimi o mea taitasi te i ua naunau tele lou finagalo.

Afioga Hon FAUMUINA TIATIA FAAOLATANE LIUGA: Faafetai lava i lau Afioga, ia o le tulaga i le faleleiga o falemai faaitumalo.. leai ou te le lauga i mea taitasi e na o mea tetele. E a foi, faletalavai i nuu i tua, aua o lea o le a o i ai fomai, manaia pe a lelei le faaaupagaina o pharmacies, aemaise lava i o i Sataua, o Salega, o Safotu, ia ma Fagamalo.

Ia aua e tasi lena mea ua lelei ai, aua a centre le matou falemai lea e i i Satupaitea, ona fai faatele lea pei o Tuasivi. Na stabilised mai lea o cases urgent, urgent cases i Satupaitea i le itu lea i Sisifo, faapena foi ia le Ituotane ma isi i Tuasivi ia ma lou faaaloalo lava.

E a foi o le faatelega o...

Tofa Olo Fiti Afoa Vaai: Lau Afioga i le Fofoga Fetalai, o se mea lava lea e ...

FOFOGA FETALAI: E malie, o le lauga a le sui usufono se i...

Tofa Olo Fiti Afoa Vaai: E puupuu lava lau faasaoga o le sui usufono mamalu. E le auai Salega i le mataupu lea, e manaia lava le fai o le matou falemai i lo matou itumalo, ae fai foi latou ia. O le mamao ia o le mea matou te o mai ai i Satupaitea, ma le agaga faaaloalo i lau Afioga i le sui usufono mamalu.

FOFOGA FETALAI: Ia faafetai, faaiu mai le saunoaga a le sui usufono lea.

Afioga Hon FAUMUINA TIATIA FAAOLATANE LIUGA: E a foi, e toe lua minute lea o le a faauma atu ai. E tatau ona fai ni indicators e iloa ai ua faaitiitia mai foi ia o faamai oti ae le o faamai le pipisi. E pei o le saunoaga a le Palemia mo le faaitaiga, o le NPF lea e i ai o tagata matutua, 12 po o le 13 tausaga talu ai, sa 8,000 le population sa faamanuiaina i le penisione a tagata matutua. I le taimi lenei, ua ova i le 10,000 o tagata matutua o lona uiga ua ova i le 2,000 ua i ai tagata ua soifua umi atu, talu ona Minisita ia le Afioga ia Tuitama. O le mea la lena, e tatau ona fua i ai, i le tulaga lea o le gasegase o le kidney. E tatau, lea e 127,000 po o le 130,000 lea e i ai, e tatau ona oo atu i le 5 tausaga lea e lumanai, ua tatau ona i lalo po o le 20 po o le 10,000 tagata la e faamama toto. Ia iloa ai, o lea e agai i luma, ia ma se i toe sui ia faaupuga, o le mea lea o faamai le pipisi. E sao lelei lava le Afioga i le Palemia, ou te le malamalama foi au, aua na ou alu i Motootua e siaki lou fatugao ae fai mai le teine, o le matua lelei o ou fatugao, ae e na o le 6 le fua o lou suka, o le matua maulalo lava.

25 IANUARI 2019

**Tulafono Tau Faaofi o Teuteuga o le Tulafono o le Soifua Maloloina 2019
– faitauga faalua**

Ia ona faaiu atu ai lea o se manatu i le Tulafono lea sa faapafala, ou te talosagaina ia le Afioga i le Palemia ia aemaise le Minisita o le Soifua Maloloina, o le Foundation Act. E aoga foi lena e toe activate, ae faaoga e fai mo le foia ai mai le pipisi e fai ai a latou preventive activities mo le agai i le lumanai. Ma lou faaaloalo lava, faafetai. Faafetai mo le avanoa.

FOFOGA FETALAI: Malo, ia leaga o lea ua ou tapa le afioga i le sui usufono o Vaimauga Sasae. Tulai mai le sui usufono o Vaimauga i Sasae, ae faafetai mo le sui usufono i le Palauli le Falefa faapei ona e saunoa e lagolago mai i le galuega a le Fofoga Fetalai, ia malo faafetai e le tau selu atu, ia ae tulai mai le sui usufono o Vaimauga Sasae.

Afioga SULAMANAIA FETAIAI TAUILIILI TUIVASA: Faafetai mo le avanoa i lau Afioga i le Fofoga Fetalai, tau foi i lenei taeao ia faamalo le faafoeina o le Nofoa o le atunuu. O lenei ua tatou aulia le aso mulimuli o lenei vaiaso ua tatou fono pea aua le manuia o ona tagata. Ia ae o lenei itumalo e fia faaali foi so matou sao, ona o le taua o lenei Matagaluega o le Soifua Maloloina.

Masalo o le tasi lenei o sui usufono e teena le Tulafono lea o le toe faaipoipo o le NHS ma le Ministry. Ona e i ai mafuaaga sa ou tetee ai ina ua tuuina mai i totonu e toe faaipoipo. Sa i ai lava lou talitonuga ma lou malosiaga i le Minsitry pe latou te fuafuaina pe latou te monitor atu le galuega sa fai e le NHS. Ia aepeitai ane o lea ua i ai lenei tulaga, e pei o lou popolega lena sa ou teena ai, ona o le a leai se vaega e mafai ona latou faatinoina ia galuega fai faapena. Ia ao lenei taeao ua aumai foi le Tulafono i lona aotelega, e lagolagoina lava, ona o le soifua maloloina o lo o ave i ai le faamuamua a lo tatou atunuu. O le mea foi lea ou te fiafia ai lava au i le taitaiga a le Taitai ia ma le vaega foi lenei, e le o fefefe lava e fai suiga ona o le soifua o le atunuu o le mea sili lea. O le sui usufono foi o Vaimauga e le o popole lava po o a tupe alu a le atunuu ae ave le faamuamua i le soifua maloloina.

O le tele o Tala o le Tupe a le atunuu i tausaga e ave lava i le Soifua Maloloina pipii ifo ai ma le Ofisa o Aoga, Loau, tatalo atu ua lava ia ia tamaiti popoto. O lea e ave le faamuamua i tua o falemai lavea atu ai ma oe le Education, ae se i aumai lena tupe e fai ai le atinae lea o le Soifua Maloloina.

Matau lava ma le totoa i lenei taeao ia le tulaga i le matamata atu i le toe tuufaatasiga, ona o le...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai...

FOFOGA FETALAI: Malie le sui usufono o Vaimauga se i tulai mai le Palemia.

25 IANUARI 2019

**Tulafono Tau Faaofi o Teuteuga o le Tulafono o le Soifua Maloloina 2019
– faitauga faalua**

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Se i ou fesili atu lava i le sui usufono, o lona uiga o lou finagalo e tapuni loa le Ofisa o Aoga ma faamuta le tofiga o lea Minisita?

Afioga SULAMANAIA FETAIAI TAUILIILI TUIVASA: Lau Afioga i le Palemia, o le uiga o lau tala ina ua fai foi le survey a lenei sui usufono, fai mai le tala a tamaiti aoga, tua ova mea e fai, ova activities e faatino e le Matagaluega ua leiloa la e le mafaufau o le tamaiti po o fea le mea e oo i ai ia lona aoaoina. Ua ova aoao.

Lau Afioga i le Fofoga Fetalai o le agaga autu e pei ona saunao le Afioga i le Minisita, o le siitia lea o le auunaga. O le Komiti lenei o le Vafealoai o lo o i lalo le vaega lenei o le Soifua Maloloina. E momoli le agaga faafetai i le Minisita Lagolago o lo o lagolagosua i le Afioga i le Minisita. O le tele o taimi matou te o ai i tua asiasiga se i vaavaai foi i falemai i Savaii ma iinei, matou te taunuu atu faatoa afio ese lava le Minisita Lagolago. O lo o faatino lava, o la e nofo lava i le Ofisa le Minisita, ae o le Minisita Lagolago o lo o faatino lava lana pitolaau. Maimau pe ana faapea uma Minisita Lagolago, e o e galulue ma o e vaai i tulaga i tua i mea o lo o tutupu mai. I lenei la taeao ma le toe tuu faatasiga, ia pei o le agaga lenei, ia faamalosi le tulaga foi lenei po o ai o le a latou toe vaai ma mataitu le faatinoga o auunaga lea o le a toe tuu faatasi ai. E pei lava ona ou tatalo, po o a tupe, o le soifua o le atunuu o lo o i le Matagaluega lea.

Tatou oo atu i le tulaga lea o faiga faavae, e le o po se lilo i le tulaga sa oo foi i lenei aiga, ona o le faalavelave foi sa oo i lou atalii, ona ioe lea o le tatou Malo e tuuina atu le tama i fafo mo togafitiga. Ae aumai le tala i fafo, e le mafai ona avatuina le tama. Ae mo le silafia o lenei Palemene ma lo tatou Malo, o lou atalii e nofomau i Niu Sila, e sitiseni Niu Sila ae decline mai Niu Sila. O le ala la lea o lou tatalo atu i lau Afioga i le Taitai, pe mafai ona silasila ane i faiga faavae ia Faa-va-Malo. E pei ona ou fai atu sa fai ia le matou fetuunaiga ma le matou faasea i le vaega lea. Ua ioe mai le vaega lea e avatu le ambulance vaalele faapitoa, ae te i ua teena mai e le falemai ma tulaga na. O le ala lenei o lou tatalo i faiga faavae nei,

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai...

FOFOGA FETALAI: Malie le sui usufono se i tulai mai le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: O le sao o le faamatalaga na oo mai ia te au, o lea e fautuaina e mataitu lelei ia togafitiga ia e fai iinei, a feololo ua sefe le alu atu, ona avatu loa lea. Ae o togafitiga ia e fai iinei e pei ona latou silafia, o togafitiga foi na e fai e latou pe a taunuu atu.

25 IANUARI 2019

**Tulafono Tau Faaofi o Teuteuga o le Tulafono o le Soifua Maloloina 2019
– faitauga faalua**

O lona uiga la, e leai lava se taunuuga ese ai i le avatu, ao lea e maaleale le tulaga lea e i ai le gasegase. Ae sili ona faaaauu pea ia togafitiga iinei, sei oo i se tulaga ua i ai se suiga e pei ona fai foi lau molimau ananafi. O le mea lena lea ou te malamalama ai i faamatalaga ia e aumai, ina ne i te i ua gaioi tele ia le tulaga i le avatu i o, ona faaletonu ai lea.

Ia o le isi mea, o le tele o isi foi mai, o le naunau lava lea o le tatou atunuu, ave i fafo, o le isi e oti atu iinei i le va o Motootua ma Faleolo. E faamalulu atu ai i le tama nei, o gaioga o le alofa lea sa faatino ai. Ia ma o le tele lava na o gasegase lea sa tutupu iinei, i le natinati mai o aiga, ia ae leai se isi e tapa i ai le Malo o alii fomai o lo o vaaia le gasegase o latou na e aumai ai le fautuaga.

E ala la ona ou avatua le mea lea, ona o lea foi e faafogafoga mai si aiga foi o Pau, o le mea foi lena na oo i ai, e tele nisi na muamua atu, ae o le tali lava lea e tasi. E le mafai ona gaioi le Malo, seiloga e aumai le clearance, le faatagana mai fomai ua sefe le gasegase ave loa i luga o le vaa ma lele loa i Niu Sila. Ou te leiloa i le Minisita o le Falemai pe toe i ai se isi ana faaopoopoga.

FOFOGA FETALAI: Malo...

Afioga Hon Tuitama Talalelei Tuitama: Lau Afioga i le Fofoga Fetalai, ia ona o lea ua tapa se lagona foi e tusa ai ma le tulaga lea. E mulimulitai lava i faiga faavae, e pei ona taua foi e le sui usufono, i le tulaga o lo o i ai, ona e tilotilo i le tulaga lea o le agavaa o le mafai ona faatino i le transfer atu lea iinei i fafo.

E muamua lava, e faanoi muamua le tatou fomai i o i Niu Sila ma faatalanoa ia le gasegase pe a manaomia le avatu o le mai i Niu Sila. Ia ona ave uma lava lea o sailiiliga ma mea uma na fai o togafitiga o lo o faagasolo ona fai lea o le faaiuga. E fai foi le fonu a fomai Niu Sila latou i mea ia, fai ai lea o le latou faaiuga, ma aumai le latou faaiuga e faapea mai, e ono mafai ona matou fesoasoani i le gasegase lea. Ae o lea e sili le aumai loa. Ia ona faagasolo loa lea o le avega a faapea la e le mafai ona ave i commercial flights, ona faatagisia foi lea o le fesoasoani i ambulance e ave ai. O le tele lava la o faiga faavae a le tatou Malo lea e i ai, a oo i se tulaga faapena, e totogi lava e le aiga latou le accuration agai i fafo, se i vagana la e i ai maliega e fai, ua uma ona fai muamua foi ma isi aiga ona guarantee lea e le Malo le totogiina o le vaalele faapitoa lea e ave ai i fafo pe a agavaa, i luga o le malamalamaga o fomai Niu Sila e tusa ma le fautuaga a fomai atu i Samoa e fai le latou fonu i luga o le teleconference po o luga foi o telefoni fai le latou faaiuga i le gasegase lea pe faatino le faigamalaga lea e fa itula e alu atu ai iinei i Niu Sila.

O le tasi vaega e fai i ai faaiuga a fomai Niu Sila, pe a silafia e Niu Sila, o togafitiga lava lea e fai iinei o togafitiga lava foi nei e fai e latou i o, ona felagolagomai lea i fautuaga i luga o le vaaiga o le mai ma le ofoina atu o le auaunaga talafeagai o la e ua talitonu latou e mafai ona faatino e tatou fomai.

25 IANUARI 2019

**Tulafono Tau Faaofi o Teuteuga o le Tulafono o le Soifua Maloloina 2019
– faitauga faalua**

Tasi la lena auala e fautua mai ai Niu Sila e leai se suiga o togafitiga pe a aumai iinei le mai, o mea foi ia o lea foi e faatino e matou iinei o lea ua outou faaauau i ina, i lo le toe faaopoopo atu o le isi stress e transfer ai le mai ona ono tulai mai ai lea o se faaletonu. Ia e pei la o vaega ia e ono tilotilo lautele agai i ai le fuafuaina o gasegase nei e moomia le avatu i fafo e galulue faatasi ai tatou fomai ma fomai a Niu Sila. Ma le agaga faaaloalo.

Afioga SULAMANAIA FETAIAI TAUILILI TUIVASA: Faafetai. Faamalo saunoa i lau Afioga i le Minisita. O lea e malamalama lelei lava le sui usufono, pei o le ala lea o le tatalo ona o tulaga Faava-o-Malo ma le tulaga faava faafeagaiga faapea lea ou te talanoa atu ai, ona o lou atalii o le sitiseni Niu Sila le tama, a o lea e decline mai e Niu Sila. E leai ma se latou feau e decline mai ai le avatuga o le tagatanuu i totonu. O lea la, e pei o le agaga lea e tatalo atu ai, i le va lea o le tatou Faigamalo ma Niu Sila, o lea ua fia avatu tagatanuu i o ae fai mai e le avatua. O le a ou see ese.

Ona fanau mai ai lea i le tulaga lea i tulaga faapea ua le oo le malosi o tatou...

FOFOGA FETALAI: Se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, se i ou fesoasoani atu lava i le tulaga lea. E na o le tasi lava le pule i mea nei faasitiseni, na o le atunuu lava e sitiseni ai le tagata. O le mea la lea, o tatou nei e fia sitiseni Niu Sila, aua le toe avea a outou fanau e sitiseni i Niu Sila, na o Niu Sila lava e faia le faaiuga. E taua tele le itu lea. E fai lava sina maaleale o le tulaga lea, na o tatou lava e mafai ona faia tatou faaiuga mo na o tatou lava sitiseni. Ae a oo loa lava i Niu Sila po o Amerika, na o latou Malo lava e faia faaiuga mo na o latou lava sitiseni. E matua leai, leai lava se pisinisi a tatou e oo i ai so tatou malosi. Silasila foi i le mea lea na fai e Niu Sila i le Tulafono foi lea a Niu Sila lea na tupu ai le vevesi? Na ona o ane lava o Niu Sila fai le latou Tulafono e teena ai le faamasinoga foi lea na fai e le Faamasinoga Maua luga a Peretania i le 1982 ona teena ai lava lea e Niu Sila. E oo loa i mea tau sitiseni, o le mea lava lena e pule ai le Malo ia. E tatou te fiu lava la e talanoa atu, ae tasi lava le upu a le Malo, e leai lava ma se tou pisinisi tou te alalai mai ai fua i a matou mea. Ia na ona ou faapena atu, a o le taofi lea e tatou te fai ia Niu Sila e faapea ma faapea ma faapea. E tele lava tatou manatu e ave faafautuaga, ae a fai mai lava Niu Sila e leai, leai loa. A o le bottom line lea ou te fai atu ai, e pule lava le Malo latou i a latou mataupu faatatau i latou lava sitiseni.

FOFOGA FETALAI: Malie ia lau Afioga i le sui usufono mamalu.

25 IANUARI 2019

**Tulafono Tau Faaofi o Teuteuga o le Tulafono o le Soifua Maloloina 2019
– faitauga faalua**

Afioga SULAMANAIA FETAIAI TAUILIILI TUIVASA: Ia o le a faauma atu se... Faafetai i lau Afioga i le Palemia mo le faamalamalamaina o leni foi vaega. O le tatalo la a le sui usufono i le tulaga i lau Afioga i le Minisita, o nai o tatou tagata ia pei ua leai se faamoemoega i le ola nei. E vaaia ma le alofa foi pe i ai foi le tulaga i si tamalii po o le sui usufono lea ua valaau i ai le Atua, pe leai se vaega o le falemai se i tuu i ai i latou ia ua faatalitali, ua tali mai le Matagaluega ua no hope, se i o atu i ai o tatou aiga, o faifeau ma o tatou tagata e mafuta ai e ala i le toe tuuina atu i luma o le Atua. Aua o le tulaga lea e i ai i gauta, faafetai lava i le Minisita ma le Matagaluega o lo o faataga le atunuu e o atu i totonu o potu lea e i ai mai tigaina. Ae tatalo a lou sui usufono i lau Afioga i le Minisita pe le mafai ona monitor ina ma fai togafitiga i se potu faapitoa e o atu i ai nai o tatou tagata e sii mai i le Atua, aua o le tulaga lea ua tali mai, ua leai se isi togafitiga. A o le tatou atunuu e le gata ina mamana ma mamala talosaga i luma o le Atua, o le ala lea e ala ai ona faamanuiaina si o tatou atunuu e le Atua ona o tagata e tapuai ma avea le Atua ma o tatou faavae....

FOFOGA FETALAI: Tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, ou te faale o malamalama tele i le saunoaga. A oo loa i le tulaga e tapuai ai, o la e i ai le tatou fale tapuai i le falemai. O lea la ou te fia fesili atu; o le fale tapuai lena e te finagalo i ai? O la e i ai le tatou fale tapuai lea foi e fai ai tapuaiga pe a maluu le tagata. O lea la e i ai le tatou fale tapuai ma e avanoa lava i taimi uma.

Lona lua lau Afioga i le Fofoga Fetalai, e i ai le isi faifeau na ma talanoa, na alu i le 4 i le vaveao e asi le isi faipule na gasegase, le Afioga ia Asiata. Ia ona ma talanoa lava lea. Na e alu i le 4 i le vaveao? O lau fesili lea. Fai mai? I. O le a la lau mea na fai? Na ou alu atu a lea fai le lotu ma ma talanoa. Ona a lea? O lea ma te talatalanoa, e le i umi lava ae pei e aa foi lele le vae o le gasegase to ma lana manava, uma loa ma lona ola. Ona ou fai atu loa lea i le faifeau, e te iloa, ua matua tele lou le mafaufau. Sa sili atu ona e alu i lou fale e te tatalo ai mo le manuia o le mai. O le upu a fomai i mea nei o tagata o lea e tigaina, aua ne i toe faalavelave se isi, aua le toe faalavelave, a o tatou lava ia ma o tatou uiga, o atu fai lea pese, fai lea tatalo, a o lea e manaomia e le tagata mai le absolute quietness. E tataua ona malolo. O le mea lea ua fiu fomai, o le ala lena e i ai taimi tapulaa o asiasiga ae faataga ai na o nisi taimi pupuu e o atu ai e asiasi, ona o le tomai lea faafomai e manaomia ai tagata e malolo lelei. O le isi lea mea e feoti ai nisi, o le soona natinati atu o asiasiga ma faalavelave i le mai alu atu lea, omai ia pepese, na o le faalavelave faalavelave faalavelave i le mai lea e matua moomia lelei se malologa e moe ai. E matua manaomia le moe malolo e faamalosi ai lona soifua maloloina, o lea e tau puepue mai le malosi ua alu atu.

25 IANUARI 2019

**Tulafono Tau Faaofi o Teuteuga o le Tulafono o le Soifua Maloloina 2019
– faitauga faalua**

Lau Afioga i le Fofoga Fetalai, e taua tele le sao o le sui usufono. O le taua o lea e faalua atu i a tatou faasalalauga, e le o lou alu i le falemai e malolo ai le mai, a o lou nofo lelei i le fale ma e tatalo i le Atua, aua o le Atua o le Atua e afio i mea uma lava, o la e silasila lelei mai lava i lau talosaga o fai. Ae a e alu loa e faalavelave i le mai, ona atili ai lea ona faavaveina atu le mai i le faaletonu e faavavau talu ai le le manatu loloto i le tulaga lea. E le tau faailoaina i le aiga lou alofa e ala i le tatalo, e te mafai lava ona e nofo oe i le fale, ma e tatalo mai ai pe afai o lo o tigaina. Ae asiasi i ai pe a maua le malosi ma ave sau asiga tele.

Lau Afioga i le Fofoga Fetalai, o le fesoasoani atu lena i lau mataupu ona ua tele naunau a tatou gasegase tigaina ua atili faavaveina ai le latou soifua ona o le o atu faalavelave.

FOFOGA FETALAI: Malo faafetai. Masalo ou te fautuaina le sui usufono mamalu e see ese ia le saunoaga mai le mataupu lea, ua maea foi le taimi o le sui usufono.

Afioga SULAMANAIA FETAIAI TAUILILI TUIVASA: Ia, faafetai. E pei o le agaga lava lea ua saunoa i ai le Tama o le atunuu, ae o le tatalo sa avatu ai o se potu foi lea a o la e faataotolia ma fai lava togafitiga. Ae ui i lea, o le a see ese o lena ua avatu le talosaga i se tulaga faapena.

Faafetai lava o lea ua maua ua toe tuuina atu le auaunaga a le Matagaluega mo le Soifua Maloloina i lalo o le PSC. O lea la ua maua foi manatu o lenei sui usufono ina ua saunoa foi le tatou Tama o le a ave le faamuamua i le PSC i training. Ia ua maua ai foi se manatu. Aua o le isi galuega tele lea o le faatino e le PSC o mea o interview foi na a CEOs. E uma ona fai e le PSC ona aumai loa o le tagata lea o le a appoint, ae aumai ua sui atu e le Kapeneta. E maumau ai lava la le taimi o le PSC ma e o lo o faatinoina ia interview, ae sa sili ai pe a faasalalau sao lava omai sui ia i luma o le Kapeneta e silasila i ai po o ai e mananao ai.

FOFOGA FETALAI: Tulai mai le Afioga i le Palemia leaga ua...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, ua tatau ona faasao le mea lea o le a sese tele. E i ai le itu taua o interviews nei e fai. O lea lava na ou tau atua, e toatolu e faia interviews. E i ai taimi e ono i ai lava se mea e lape ai interview, ae manatua la e 13 tagata ia e faatalitali atu. O tagata foi la ia e faatalitali atu i le Kapeneta, o tagata sa latou faia le faiva lea. E le o ni tagata faaletonu la le Kapeneta lea e saofafai atu. O tagata sa latou faia le faiva lea o le faatalanoa o Ofisa Sili o Pulega. Sa faauluulu foi i ai Matagaluega i le toatele lea e saofafai atu i i. O nisi o faaululuga o kamupani sa latou faia le mea lea o le interview o tagata faigaluega. E le o se Kapeneta faaletonu la le Kapeneta lea e faatalitali ogaumu.

25 IANUARI 2019

**Tulafono Tau Faaofi o Teuteuga o le Tulafono o le Soifua Maloloina 2019
– faitauga faalua**

O le tulaga la e i ai, masalo a ou faatulagaina, po o le 95% o fautuaga a le panel lea e sau lava ma faaalu e le Kapeneta ina ua vaai atu le Kapeneta ua matua selau pasene le faafoeina o le talanoaga. Ae na o le isi la 5% e tilotilo atu le Kapeneta e i ai le faaletonu. Ia manatua e tatau ona io mai le sui usufono o lea e lauga nei e sili atu ona tele mea e iloa e le 13 lea, na i lo le toatolu lea e faia le interview. Lona lua, o le upu a le atunuu lenei, o le tele o lou soifua i le lalolagi lenei, o le tele foi lona o lou iloa. Ia se i silasila mai la i le sinasina o lauao o le Kapeneta lea e saofafai atu nei? O le tele o le soifua o le tagata i le lalolagi lenei, o le tele foi lona o lona iloa.

Lau Afioga i le Fofoga Fetalai, e aoga foi lou tu atu i le sui usufono, o le aui usufono e talavou.

FOFOGA FETALAI: Malie le sui usufono e faaiu mai le saunoaga.

Afioga SULAMANAIA FETAIAI TAUILILI TUIVASA: Ia, o le a faauma atu sa matou tala lau Afioga i le Fofoga Fetalai ona o lea ua malele le Afioga ona o le fiafiaga foi lona o lenei sui usufono ua aveese lea vaega ma le PSC ae fai isi galuega. Ou te faafetai atu i le Matagaluega o le Soifua Maloloina ona o le tamalii foi o si ou itumalo, ona pei o le mea lona sa mitamita ai lava le agaga ona e pule atu le isi i le Ministry ae pule atu le isi i le NHS. O le mea lona e mitamita ai le sui usufono o lenei itumalo ona o le tama ma le teine Vaimauga. Ia e tatalo atu, faafetai mo le lua taitaiga o le tatou Matagaluega, o lea ua tulai mai i le tulaga aotelega, o lua mama na, o ai lava o le a avea ma Ofisa Sili o Pulega, ia o oulua lona.

Faafetai atu i lau Afioga i le Fofoga Fetalai, ia maua lou soifua laulelei aua le faafoeina o le sa o Samoa. Ona o le suafa o Iesu.

FOFOGA FETALAI: Faafetai. Malo, tulai mai le sui usufono mo Gagaifomauga Nu.3.

Susuga Hon LAAULI POLATAIVAO LEUATEA (Gagaifomauga Nu 3): Faafetai i lau Afioga i le Fofoga Fetalai mo le avanoa, faatalofa atu foi i lo tatou Maota i lenei vaega o le aso aemaise foi Ofisa sili o Pulega. Ua le nofonofoi lenei itumalo ona e lagona le agaga talitonu o se tasi lenei o Tulafono ua leva ona taumafai mai le Afioga i le Minisita ma le Matagaluega ona o se Tulafono taua mo lo tatou atunuu aemaise le tauavameaina o lenei Matagaluega taua. E momoli atu ai le faafetai ma le lagolago a lenei itumalo. E pau lava o lea, e tatau pea ona avatu nai motugaafa. Aua a manatu i le Tulafono lenei ua tatou toe tilotilo ua tatou toe foi i le mea na o tatou i ai muamua. Toe foi le vai i le mea na tafe mai ai, o fuafuaga foi ma lavasiga i futia ua sola na faataatia mai ai le tauavameaina o le tatou galuega, tatou o foi lea toe sui. Na fai le suiga e vaelua, ae taumafai e fai ona o nisi foi o manatu ma lagona i lona foi vaitau. O le mea lea e tatau ona fai e lelei atili ai le Matagaluega, ao lea foi ua oo mai i lenei taimi, ao lea foi ua tatou toe matau, e pei ua le lelei le mea na fai muamua, tatou o fai le mea na lona lua ua le lelei, ao lea foi ua o tatou o mai tatou toe foi i le mea muamua.

25 IANUARI 2019

**Tulafono Tau Faaofi o Teuteuga o le Tulafono o le Soifua Maloloina 2019
– faitauga faalua**

Lau Afioga i le Minisita ma le Matagaluega, faafetai mo faatofalaiga o lea ua saunua atu le tele o sui usufono. Avatu lagona ma avatu fautuaga, i fuafuaga ia ua maea ona e faataatia. Taumafai e sefe a tatou tupe alu, taumafai e sefe le duplication, taumafai e fetuunai mea mo le lelei atili o le Matagaluega. E ui foi ina fai la tatou Komisi Suesue, e saili pe tatau ona faamavaevae pe leai, pe tatau ona tuu ai pea i le mea lea e i ai i le taimi lenei. E lafo atu pea i ina o i ina na e i ai le pule e faatino ai le faaiuga. Ao le mau ma le fautuaga a le itumalo lenei lau Afioga i le Minisita e alofa atu. Aua foi po o a tatou fuafuaga e fai, o a tatou structures e fai, o a mea uma tatou te mana'o e fesui'ai ae a le talafeagai lava ma le faatinoga, e maumau le taimi. O le auga atoa lena o le mea lea e avatu ai le tuualalo. E le mafai ona faagaioi le mea lenei pe a le o gatasi le futia ma le umele, i finagalo o e o le a filifilia e tauave foi le structure fou lea. Ma o le fatu atoa lena o le mea lea ua tatou toe o ai nei e toe sui la tatou structure lea na i ai le faamavaevae mai le mea lea ua o tatou i ai i le taimi lenei. E le galulue faatasi le tulaga lea na mafua'í ..o le auga atoa lena o faamatalaga nei na aumai. E le o maua le fesootaiga vavalalata a e o lo o faigaluega. O le agaga atoa lena e tatau ai ona tatou tilotilo i le structure lea ua e toe aumaia. Lau Afioga i le Minisita toe silasila totoa lelei ia i latou o le a filifilia ma faigaluega ma lipoiina le Matagaluega. O lea foi e aliali lava le feeseeseai o fomai ma teine tausisoifua. E le o lilo i lalo le mea lea e tupu, o lea foi e matua aliali lava le tele o le feteenaiga ma manatu ma lagona i totonu o le aufaigaluega. We need one heart one goal e tauave ai le Matagaluega. O le tagata e i ai le passion, love and heart e kiliva ai. Ae ou talanoa atu i le taimi lenei e toalua toatolu nai tagata o lou itumalo la e i uta, o la e taufao le mai ma le magalo o le ola. O lona uiga lau afioga e taua le system lelei e faataatia e alu ai le Matagaluega mo le lumanai. O le matou tatalo lena, aso uma maluu aso uma maluu, e le misi. Ao le agaga ma le faamoemoe a lelei le faatinoga, implementation and administration, a lelei lona faatinoga, ia ona tuu mamaina mai lea o mea ia e tutupu. Lelei fesootai, there is no more room for argument for the health. You need to consolidate, communicate and cooperate. O le tuualalo lena a lenei itumalo, aua o le ola, o le ola o le atunuu, aso uma taimi uma faalavelave, e le maalofia faalavelave faafuasei. Ae lafo atu, e avatu pea le lagolago i lau silasila ma lau maimoa ua lava lou silafia. O oe foi o le tausisoifua e sili atu lou iloa, i le mea e tuutuu mamao i ai le sa o le Matagaluega. Ao le tatalo, ia tasi le loto, tasi le fatu e faatino ai le galuega a le Matagaluega. O si au tuualalo lea ma le agaga faaloalo.

FOFOGA FETALAI: Malo faafetai. Se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, o le agaga tonu lava lena o le Tulafono. E i ai le mea lea e tupu. O le mea lea e tupu, o le lalolagi lenei tatou te i ai e le o se lalolagi atoatoa, mai lava i le taimi na pau ai Atamu ma Eva. O Atamu lava ma Eva na mafua mai ai nei mea. E mai lava i le taimi na pau ai Atamu ma Eva, o lea lava e feoai solo tatou ma le mau Satani.

25 IANUARI 2019

**Tulafono Tau Faaofi o Teuteuga o le Tulafono o le Soifua Maloloina 2019
– faitauga faalua**

Manatua foi, o leaga uma e mafua mai i le tiapolo, o gasegase uma e mafua mai i le tiapolo. O la tatou sala lena. E ala ona fai atu nei mea, e taumafai pea tatou e fai mea lelei ma tatou faatuatua e fesoasoani mai le Atua, ae e i ai foi le tiapolo, e le mafai ona nofonofo. O lea na valaau le fanau a le Atua e pei ona tusia ae oso ane ai foi ma le tiapolo. Fesili le Alii, õo fea foi e te oso mai ai oeõ? ae fai mai, õSa ou taamilomilo i le lalolagiõ. Ua e vaai la i lau auauna faatuatua. Na pai lava i ai aao faaosooso a Satani. Lau Afioga i le Fofoga Fetalai, e faapena. E le mafai ona tatou taofiofia le tiapolo, leaga o le tiapolo o le amataga o mea leaga uma. A toe tupu mai foi la nisi mea i le falemai, aua le faitio fua i le fomai, ae faitio ia Satani?. Ae faapefea ona tatou maua, e faapefea ona tatou sosoaina Satani, o le mea la lena a tatou umaí .tatou toaga e tatalo. O le mea lena e taua tele ai le galuega o lo o faia pea e le aufaigaluega paia a le Atua, aua a tatou le tatalo ma tatou agapopogi, e i ai lava le faaosoosoga e sau pea ia i tatou i taimi uma taimi uma taimi uma. E tatou te taumafai e fai mea lelei ae i ai mea leaga e tupu mai. E le o le faatamala la o le Minisita o le Falemai, ae i ai lava le tiapolo e faaosooso. E tiga lava ona lelei mea e fai, ae i ai lava le tiapolo e faaosooso.

FOFOGA FETALAI: Malo, ou te tapa lau Afioga i le Minisita pe i ai se isi faaopoopoga o mea sa e tali ai i saunoaga a sui usufono. Aua o lea lava ua uma ona tali le Palemia. Pe o le a tuuina atu loa le fesili? Faafetai.

Na faamaonia le lafo ma faitauina le Tulafono Tau Faaofi o Teuteuga o le Tulafono o le Soifua Maloloina 2019 i lona faitauga faalua.

FOFOGA FETALAI: Ia, ua i ai le manatu o le galuega o lo o sosoo ai o le auiliiliina o le Teuteuga o le Tulafono Tau Faaofi. Ua i ai le manatu o le faataoto mo le Aso Fono i le vaiaso a sau. Ae mo le taimi nei, ua tatou toai taunuu i le taimi e manava ai le tatou galuega. O lea ua uma ona faitau faalua le tatou Tulafono, ia o le galuega i le vaiaso e sosoo ai, o le auiliiliga o le Tulafono Tau Faaofi o le Soifua Maloloina e pei ona tuuina mai.

Ia, ae tatou te le i tolopo ma faataatiaese Galuega a le Fono Aoao, o le a ou faaiuina le tatou Fonotaga i se tatalo.

Na tolopo Taulumaga a le Fono Aoao Faitulafono i le itula e 11.55 i le taeao seia aulia le itula e 9:00 i le taeao o le Aso Gafua, 28 Ianuari 2019.